

四庫全書

史部

欽定四庫全書

通鑑釋文辯誤卷十

宋 胡三省 撰

通鑑二百八凡四條

中宗神龍元年敬暉瞿然不悅

海陵本釋文曰瞿九縛切說文遠視貌余按九縛切
乃矐字矐音九遇翻驚視而失其常度之貌陸德明
經典釋文甚明史炤於此音紀具切是至二百四十
八卷武宗會昌四年炤音又非

左衛將軍上邽紀處訥

史炤釋文曰上邽即秦州天水縣余按漢書地理志上邽縣屬隴西郡天水別為郡名新唐書地理志秦州天水郡治上邽無天水縣宋白續通典秦州有天水縣而清水縣治上邽鎮史炤所云未知何據

二年改贈后父韋玄貞為鄴王后四弟皆封郡王

費本注曰鄴郡名余按唐制后弟封郡王韋玄貞后父必贈為國王鄴者封國之名非郡名也且自古未

嘗有鄴郡去年已封韋玄貞為上洛王上洛郡名也
自郡封而進贈國封中宗之濫爵固不足言然郡封
國封之制則不可以無辯

袁恕已踣地爪甲殆盡

史炤釋文曰踣蒲墨切僵也余按僵踣之踣其旁從
足不從手袁恕已若只僵踣於地何為爪甲殆盡此
由以爪甲爬地也類篇踣從蒲侯翻今從之

通鑑二百九 凡三條

景龍元年武平一名甄以字行

史炤釋文曰甄之人切余謂音之人切者姓也人之有字以表其名甄之為義明也察也別也惟明惟察惟別然後能平一此正以甄明甄察甄別而命字甄當音稽延翻

睿宗景雲元年上御梨園毬塲

史炤釋文作梨園注曰梨憐題切余按此乃梨園非梨園也果木之梨音力脂翻

命韋溫總知內外守捉兵馬事

史炤釋文曰唐制兵之戍邊者大曰軍小曰守捉曰

城曰鎮而總之曰道

費本同

余謂此乃京城皇城宮城

內外守捉兵馬非邊戍之守捉也宣宗之崩踵故事
增人守捉此其證也

通鑑二百十

凡二條

二年前右率府鎧曹參軍柳澤

史炤釋文曰鎧甲也鎧曹十六衛官屬也

費本同

余按

唐制太子十率府亦有鎧曹等諸參軍柳澤乃十率府屬非十六衛府屬也右率府右衛率府

玄宗先天元年能撩李日知嗔

史炤釋文曰撩蓮條切說文撩理也

海陵本同

余謂炤音

是而義非撩取也嗔怒也言取怒也又俗說以撓發為撩今人謂相挑發為相撩撥

通鑑二百一十一

凡一條

開元二年立皇子嗣主為鄆王

史炤釋文曰鄆於巾切故衛地在濮陽余按衛地之
鄆音吉掾翻無於巾一音

通鑑二百一十二

凡二條

七年王毛仲嚴察有幹力萬騎功臣閑廢官吏皆憚之
史炤釋文曰睿宗改千騎曰萬騎余按太宗選驍勇
者從遊獵謂之百騎則天時稍增為千騎中宗改曰
萬騎非睿宗也通鑑於睿宗景雲元年書萬騎本末
甚明

十三年更名長從宿衛之士曰彊騎分隸十二衛總十二萬人為六番

史炤釋文曰隋制十二衛唐因之曰翊衛曰驍騎衛曰左衛曰右衛曰禦衛曰候衛為左右馬彊騎分隸十二衛每衛萬人余按唐受隋禪置十二衛府已微變其官名至武德五年又改云辯見一百八十六卷高祖武德元年今史炤所云十二衛武德元年之制也以唐六典考之則開元之十二衛曰左右衛曰

左右驍衛曰左右武衛曰左右城衛曰左右領軍衛
曰左右金吾衛

通鑑二百一十三

凡二條

十五年賜貴近絲一綬

費本注曰綬謂之綬余按晉書綠綬綬謂以炭少染
綬故綬因謂之綬此言絲一綬猶絲一繚耳非綬綬
之綬唐制麻三斤為綬未知絲一綬其為斤兩何如
也史炤亦曰綬猶繚也

十八年京城第舍郊畿田園參半皆宦官矣

史炤釋文曰參半間厠也余謂參者三也或三分之一或三分之二也半則中分而言之言有其半也

通鑑二百一十四

凡一條

二十四年史瓘于者與安祿山同里閑

史炤釋文曰閑說文問也汝南平輿里門曰閑余謂此亦史炤以廣韵為據也按漢高祖居沛與盧綰同里閑何特汝南平輿里門曰閑哉

通鑑二百一十五

凡四條

天寶元年隴右節度使統臨洮河源白水安人振威威戎漠門寧塞積石鎮西十軍

史炤釋文曰寧塞廓州軍後曰寧邊余按隴右所統十軍而獨釋寧塞一軍何也十軍註詳見通鑑正文下

田同秀上言見玄元皇帝告以我藏靈符在尹喜故宅上遣使於故函谷關尹喜臺旁求得之

史炤釋文曰崔浩云尹喜為散關令也蓋老子嘗過
尹喜故田同秀託言藏靈符於尹喜宅耳余按抱朴
子云老子西遊遇關令尹喜於散關為喜著道德經
一卷謂之老子其說與崔浩同又李尤函谷關銘云
尹喜邀老子留作二篇則以喜為函谷關令括地志
散關在岐州陳倉縣東南五十二里函谷關在陝州
桃林縣西南十二里又岐州盤屋縣樓觀山有尹喜
舊宅今為崇聖觀山脚有授經臺此亦以尹喜為散

關令故有其遺蹟也但唐玄宗因田同秀之言求符
於故函谷關尹喜臺旁則以尹喜為函谷關令矣史
記言老子去周度關時周都洛函谷關為是

二年崔成甫紅栢首

史炤釋文曰栢普駕切通俗文帛三幅曰帕

海陵余本同

按栢首之栢莫百翻今人謂之抹額是也韓愈元和
聖德詩以紅栢首若通俗文所謂帛三幅者謂帕也
非栢首之栢

四載褚訥戰死

費本注曰訥直殺切余按訥直嚴翻費本誤

通鑑二百一十六

凡二條

八載吐蕃多貯糧食積橐木及石

史炤釋文曰橐盧回切余按此橐木即前卷礮應如雨之橐合音盧對翻史炤音釋前後不相相應類如此

十載高尚雍奴人

史炤釋文曰雍奴雍州縣名余按唐書地理志幽州有雍奴縣非雍州也

通鑑二百一十七

凡五條

十四載賈循華原人也

史炤釋文曰華原邑名屬耀州余按五代史梁開平初華原賊帥溫韜聚衆據縣岐王李茂貞始以華原置耀州使韜鎮之此時未有耀州也新唐書地理志華原縣屬雍州開元元年以雍州為京兆府

安祿山乘鐵轡

史炤釋文曰轡羊茹切余謂此轡字即輿字今人多讀從平聲蓋舁車之轡是人轡之則音羊茹切若乘轡則人乘車輿也讀當平聲二百二十五卷代宗大歷十四年乘轡誤同

祿山步騎散漫人莫知其數

史炤釋文曰漫謨官切又莫半切余謂當從下音

肅宗至德元載魯炆屯葉北以備安祿山

史炤釋文曰葉縣之北汝州也余按通鑑下文魯昊立柵於澧水之南未至汝州

程千里出崞口討賊

史炤釋文曰崞口在代州

海陵本同

余按舊唐崞口在相

州西山在代州者崞縣非崞口也二百二十六卷德宗建中二年崞口注亦誤

通鑑二百一十八

凡五條

同羅曳落河居五分之一

史炤釋文曰安祿山所劫同羅兵號曳落河余按祿山養同羅奚契丹降者八千餘人號曳落河曳落河者胡言壯士也是時史思明等合兵五萬餘人而同羅曳落河居五分之一是同羅曳落河不下萬人矣祿山在洛方圖關輔所養曳落河八千餘人若以萬人付思明反浮於所養之數不應如此蓋同羅者阿布思之部落也阿布思敗死其部落歸祿山祿山簡同羅之壯者與奚契丹之壯者養之通謂之曳落河

其不預曳落河之養者尚多今遣助思明者同羅之
兵及曳落河通有萬許人耳

芟涉至此勞苦至矣

史炤釋文曰芟草舍一曰草木根本亦作跋余按芟
草舍也鄭康成之說草行曰芟水行曰涉正應此義
不當妄引草木根本以自雜其說

太子至烏氏彭原太守李遵出迎

海陵本釋文曰是年改烏氏曰保定余按烏氏漢縣

故墟在彭原東南據舊唐書烏氏驛名新唐志保定縣本漢安定縣唐為涇州治所在彭原西一百二十里保定縣固是年更名然非烏氏之地

太子至平涼閱監牧馬

史炤釋文曰渭州有馬監余按唐之盛也秦蘭河渭涇原岐豳寧慶鄜坊延夏及河曲之地凡監四十有一豈特渭州有馬監哉時太子所閱者平涼之監牧平涼原州非渭州也

賊勢大熾西脅汧隴

史炤釋文曰汧水在安定余按前漢書地理志汧水出扶風汧縣西北又曰郁夷縣有汧水酈道元以為汧水即魚龍水唐書地理志隴州有汧源縣汧陽縣皆因汧水而名汧水不在安定

通鑑二百一十九

凡一條

第五琦請以江淮租庸市輕貨汧江漢而上至洋川
史炤釋文曰洋音祥漢戚夫人生於洋川高祖寵之

名其川曰洋川以表誕生之休祥也

費本同

余按洋川

漢時漢中成固之地劉蜀分成固立南鄉縣晉改為西鄉縣後魏廢縣於豐寧戍置豐寧縣尋於縣置洋州及洋川郡隋開皇初廢郡大業初廢州復為西鄉縣唐武德元年析梁州之西鄉黃金興勢置洋州天寶改洋州為洋川郡漢書言定陶戚姬不言生於洋川地理志止有成固縣不載洋川戚夫人生於洋川本之鄴道元水經注道元好竒之過也

通鑑二百二十 凡三條

至德二載史思明開井陘路

史炤釋文曰井陘山在鎮州井陘縣余按唐穆宗諱
恒始改恒州為鎮州玄宗改州為郡恒州曰常山郡
肅宗改郡為州復曰恒州此時未有鎮州也
乾元元年李嗣業在河內安慶緒涉沁水攻之

史炤釋文曰沁水縣名屬澤州

費本同

余按唐書地理

志沁水出沁州沁源縣東南出山而東流過河內縣

北安慶緒自鄴攻河內須涉沁水而進兵此指河內之沁水非澤州之沁水縣也

王仲昇斬党項酋長拓跋戎德

史炤釋文曰拓跋本代地元魏複姓余按元魏之拓跋氏起於代北党項之拓跋氏起於西陲宋朝之西夏党項拓跋之後也寶元康定之間憑陵中國慢書狎至使其出於元魏亦必張大而言之而未嘗語及者非其所自出也唐書列傳党項以姓別為部一姓

又分為小部落有細封氏費聽氏往利氏頗超氏野
辭氏米禽氏拓跋氏而拓跋氏最強二百五十八卷
昭宗大順元年注又誤

通鑑二百二十一 凡二條

二年郭子儀等圍鄴城壅漳水灌之

史炤釋文曰山海經曰漳水出荆山南注于沮水余
按郭子儀壅鄴旁之漳水以灌城非出荆山之漳水
九十七卷晉康帝建元二年趙王虎投王波父子之

尸于漳水釋文之誤正與此同已辯於前矣二百六十卷昭宗光化三年漳水注復誤蓋史炤讀書不多只據廣韵以釋通鑑又不能親師取友以求聞所未聞所以到底錯了孤陋自是者其戒之哉然余亦當自以此為戒也

李光弼自將屯中潭城

史炤釋文曰河南縣有中潭城余按河陽有三城以守河橋自晉杜預建橋於富平津此大河有橋之始

也然未有城也後魏孝文自代遷都于洛又作河橋
河側北岸有二城置北中郎府徙諸從隸府戶并羽
林虎賁領隊防之魏氏分為東西東魏得洛懼西人
之侵軼雖徙洛人於鄴而河陽仍為橋以聯絡懷洛
觀宇文與高氏交兵於邙洛之間則可見矣高敖曹
之敗也叩河陽南城以閉關不內而以此時蓋已有
南城宇文泰縱火船欲焚河橋斛律金所以禦之者
必於中流制之意此時亦必有中渾矣史思明入東

京李光弼據河陽與之相持思明來攻三城皆受敵
光弼自將屯中渾應接南北二城視其所急而赴之
安史既平河朔藩鎮桀驁唐於此置河陽三城節度
使遂為重鎮中渾城三城之一不在河南也宋白曰
中渾城東魏所築

通鑑二百二十二

凡三條

上元二年奴刺党項寇寶鷄

史炤釋文曰渾奴刺也吐谷渾自稱曰渾主故以渾

奴刺言之

費本同

余謂吐谷渾自是一種奴刺自是一

種吐谷渾王舊自稱可汗未嘗自稱曰渾主史或以渾奴刺連言亦言渾與奴刺兩種耳太宗貞觀二十一年奴刺啜匐侯友內附此則奴刺別是一種之明證也

代宗廣德元年田承嗣為魏博德滄瀛五州都防禦使史炤釋文曰魏博藩鎮自田承嗣始傳五世至田弘正入朝十年復亂更四姓傳十世有州七曰貝魏博

相磁洺衛余謂此通鑑書以魏博授田承嗣之始然
此時命承嗣為魏博德滄瀛五州都防禦使未須以
貝魏博相磁洺衛七州為注詳辯於二百六十六卷
梁太祖開平元年

明經則誦帖括以求僥倖

史炤釋文曰謂為機括而誦之余按高宗之時以劉
思立之言明經加試帖舉人乃總括經文以類聚之
而誦習以應帖試謂之帖括括總括也非機括之謂

通鑑二百二十三 凡一條

二年秋七月稅天下青苗錢以給百官俸

史炤釋文曰唐租庸調之法壞代宗始以畝定稅而稅以夏秋時以國用急不及秋苗方青即征之號青苗錢余按乾元以來天下用兵京司百僚俸錢減耗代宗即位推恩庶僚下議或以稅畝有苗者公私咸濟乃分遣憲官稅天下地青苗錢以充百司課料若定夏秋二稅則德宗即位方行其法非代宗也史明

書秋七月稅天下青苗錢安得謂不及秋即征之乎

通鑑二百二十四 凡二條

大歷五年元載請割郿號寶鄠藍屋隸李抱玉

史炤釋文曰郿號並扶風縣名余謂史炤僅能引漢書地理志耳漢右扶風有郿號二縣及晉省號縣存郿縣後魏於號縣地置武都郡西魏置洛邑縣後周置朔州州尋廢隋開皇初廢武都郡大業初改洛邑縣為號縣後魏又於郿縣置平陽周城二縣西魏改

平陽為郿城後周廢入周城縣隋開皇十八年改周
城曰渭濱大業二年改曰郿縣扶風隋唐為岐州時
為鳳翔府

朕今親御禁旅

史炤釋文曰旅衆也說文軍五百人為旅余謂禁旅
直言禁兵耳不必拘五百人為說

通鑑二百二十五

凡一條

十四年澤州刺史李鷄上慶雲圖詔曰鄉雲靈芝怪草

異木何益於人

史炤釋文曰卿如字文選卿雲黼黻河漢謂司馬長卿揚子雲也後言瑞者以卿雲為慶雲皆取黼黻河

漢之意

海陵本
費本同

余謂史炤繆矣古者卿慶同音班固

白雉詩永延長兮膺天慶叶韵音卿是也卿雲即慶雲晉天文志瑞雲一曰慶雲一曰景雲嘉氣太平之應也

通鑑二百二十六

凡五條

沈既濟上選舉議曰責於侍郎則曰量書判資考而授之不保其往也

史炤釋文以量書為句斷註曰尚書掌七品以上選侍郎掌八品以上選皆有銓量之書所以叙其資地而進退之也

費本同

余觀沈既濟之議其上文曰考校

之法在書判簿歷言詞俯仰而已是書判也非銓量之書也又曰量資積考非勞也是資考也非資地也唐擇人之法有四曰身言書判身取其體貌豐偉言

取其言辭辯正書取其楷法適美判取其文理優長
資考者限年躡級謂之資課校殿最謂之考

京畿觀察使崔寧

史炤釋文曰天子千里地以遠近言之則言畿此指
京師故謂之京畿余按古者王畿地方千里唐以長
安為西京洛陽為東都有京畿都畿京畿觀察部京
畿諸州謂雍岐同華商邠也

德宗建中元年朝臣請赦劉文喜上皆不聽曰微孽不

除何以令天下

史炤釋文曰孽庶子也猶木之有孽生故以為諭余按史炤此亦本之廣韵然劉文喜豈唐之庶子哉凶孽妖孽皆孽也不專以庶子為義此言微孽猶凶孽之孽耳一百五十二卷梁武帝中大通二年魏高歡言嬖孽擅朝指鄭儼徐紇也炤之誤亦如此

劉海賓言於上曰臣乃陛下藩邸部曲

史炤釋文曰藩謂為藩屏者凡郡國朝宿之舍率名

邱邱至也言所歸至也余謂炤說自通但初讀者未
易遽曉且以此釋藩邱部曲四字其義猶欠明切唐
人率稱諸王邱第為藩邱謂藩國邱第也此說較簡
明寶應初上以雍王為天下兵馬元帥故劉海賓自
謂藩邱部曲

王國良遣使乞降猶疑未決

史炤釋文曰猶餘救切攬屬其性多疑一說隴西人
呼犬子曰猶好先行却住以俟其人遂曰猶豫猶疑

亦猶豫之謂余以文執觀之不過言王國良猶持疑而未決降計耳猶之為義尚也如左傳尚猶有臭其莠猶在賈誼所謂猶尚如此之猶不必引猶豫以釋猶疑也

通鑑二百二十七

凡三條

二年南至江淮閩越

史炤釋文曰閩越東南越余按此言閩謂七閩之地及百越之地耳若以漢書言之則閩越之地今福建

路是也東越之地今温州是也南越之地今交廣是也豈得謂閩越為東南越乎一百六十七卷陳武帝永定元年注閩中亦誤辯已見前

宣武節度使劉洽

史炤釋文曰宣武節度使自劉玄佐始傳四世而滅有汴潁宋亳余按新唐書方鎮表建中元年分宋亳潁別為節度使尋號宣武節度使是時李勉以永平節度使鎮汴州其後陷於李希烈至興元元年劉洽

破希烈復汴州始有汴宋潁毫四州尋徙宣武軍治汴州治改名玄佐玄佐傳子士寧士寧為李萬榮所逐是劉氏在宣武僅二世也何嘗傳四世哉

入敕使院擘裂殺之

史炤釋文曰擘博厄切說文撓也余按此乃分擘之擘非撓也

通鑑二百二十八凡三條

四年外侵則汧渭為戎

史炤釋文曰汧渭二水出鳳翔府寶雞縣余按二百一十八卷肅宗至德元載炤釋汧隴之汧已誤今又誤漢書地理志渭水出隴西首陽縣鳥鼠山而東流汧水出右扶風汧縣西北水經注汧水東流合于渭渭水又東逕陳倉縣唐改陳倉縣為寶雞縣渭水則過寶雞汧水不惟不出寶雞且不至寶雞矣陸贄所謂外侵則汧渭為戎者謂吐蕃侵逼也汧水在唐隴州界渭水出唐渭州界代宗初吐蕃陷秦渭入大震

關唐遂以隴州為極邊故曰汧渭為戎

以李昌巵為京畿渭南節度使

史炤釋文曰巵渠龜切

海陵本同

余按巵奴刀翻史炤鹵

莽以其字旁從夔遂自為音切也

膠水蔣沈

史炤釋文曰膠水在漢膠東縣一曰密水唐時膠西為密州余按水經膠水出黔陬縣膠山北過其縣西又北過夷安下密膠東當利縣北入於海漢書地理

志黔陬縣屬琅邪夷安縣屬高密下密縣屬膠東國
無膠東縣當利縣屬東萊郡唐書地理志萊州有膠
水縣萊州古東萊郡地膠水縣蓋當膠水下流入海
之地非密州也

通鑑二百二十九

凡二條

朱泚推雲梯載壯士攻城翼以輶輜

史炤釋文曰說文淮揚名車隆穹為輶應劭曰輶輜
匈奴車博雅以為柳車余按柳車非所以攻城應劭

以輶輶為匈奴車者因漢書揚雄傳砮輶輶破穹廬而為之注也蓋輶輶者攻城之車兵法曰修輶輶距闐者三月而後成謂攻城也輶輶不特匈奴有之中國亦有此車

韓滉修塢壁起建業抵京峴樓堞相屬

史炤釋文曰京峴山名京大也即琅邪大峴山

費本同

余按韓滉時鎮潤州修塢壁起建業抵京峴京峴山在潤州州治東五里琅邪之大峴山在沂州滉修塢

薛自建業抵潤州之京峴山耳安能絕江越淮抵沂
州之大峴山邪況此時陳少遊鎮淮南而沂州又李
納巡屬也韓滉決不能跨據他鎮疆土而修塢壁蓋
滉以乘輿播遷欲阻江自守其治樓堞起昇抵潤皆
自守規摹也

通鑑二百三十

凡二條

興元元年專虛名而不副之以實則誕謾而人情不趨
史炤釋文曰誕謾不經之稱余謂妄為大言曰誕欺

語曰謾皆虛而不實之謂非不經之稱也

張獻甫怒樊澤曰行軍乃敢自圖節鉞

史炤釋文曰節以專殺斧鉞以專斷余按記王制諸侯賜鉞然後殺是斧鉞以專殺也至於漢魏以下持節者亦得以專殺唐中世以後置諸鎮節度使建節樹六纛亦得以專殺故授節度使者謂之授旌節亦謂之授節鉞若曰節以專殺斧鉞以專斷恐字義不可如此區別自是之後炤屢拈出此二語蓋自以

為得而不知其失也

通鑑二百三十一 凡四條

進退羈礙

史炤釋文曰羈馬絡頭也礙謂羈所掛礙也余按羈者有所絆礙者有所止

鐘虞不移

史炤釋文曰虞音具余按經典釋文及諸字書虞音巨無音具者此又蜀人土音之訛

貞元元年新州司馬盧杞遇赦移吉州長史陳京趙需等爭之不已上大怒左右辟易京顧曰趙需等勿退

史炤釋文曰京姓也風俗通云鄭公子段封京城其後因為氏顧其名余按陳京趙需等爭盧杞移吉州長史事德宗大怒當時左右之臣皆辟開而易其故處陳京乃顧謂趙需等曰勿退此一段稍識文理者皆知京之為陳京顧之為回顧也史炤以京為姓顧為名大似不識文理彼豈真不識文理哉其病在於

不詳觀通鑑上下文而輕為注釋至於板行其書以誑後學不知乃所以自彰其繆妄也

以李泌為陝虢都防禦水陸運使泌宿曲沃將佐來迎
史炤釋文曰曲沃縣名屬絳州余按此非絳州之曲
沃也絳州之曲沃晉封桓叔者也春秋之時晉以曲
沃為別都蓋自桓叔至武公宗廟在焉其地在大河之
東李泌自長安赴陝州無緣迂路度河至絳州之曲
沃水經注云曹陽亭在弘農縣東十三里又東有曲


沃城春秋時晉侯使詹嘉守桃林之塞處此以備秦
時以曲沃之官守之故曲沃之名遂為積古之傳肅
宗至德二載廣平王俶與郭子儀收西京安慶緒將
張通儒等走保陝追至曲沃大破賊於新店遂入陝
城此即李泌所宿之曲沃也絳州之曲沃人所共知
陝州之曲沃人有不能知者矣吁地理之難言蓋如
此

通鑑二百三十二 凡二條

陸贄上奏曰以逆泚之偷居上國懷光之竊保中畿
史炤釋文曰天子千里地以遠近言之則言畿當天
下之中故謂之中畿余按陸贄所謂懷光竊保中畿
謂懷光竊保河中也玄宗開元八年以河中為中都
河東河西為次赤縣餘縣皆為次畿縣懷光據河中
諸縣皆為所有故言中畿蓋洛陽為東京則河南府
諸縣為東畿長安為西京則京兆府諸縣為西畿河
中府居兩京之中以為中都故謂之中畿也

二年百姓至蒸鬱手足以避役

史炤釋文曰蒸火氣上行也熨持火所以申繒也余按以火申繒固謂之熨然此言以火熨手足耳不必以申繒為釋



通鑑釋文辯誤卷十

欽定四庫全書

史部

通鑑釋文辯誤卷十一

詳校官修撰臣錢 蔡

刑部郎中臣許兆禧覆勘

總校官編修臣王燕緒

校對官修撰臣張書勲

謄錄監生臣張孝基

欽定四庫全書

通鑑釋文辯誤卷十一

宋 胡三省 撰

通鑑二百三十三

凡二條

三年李泌曰太子安有異謀彼譖人者巧詐百端雖有手書如晉愍懷衷甲如太子瑛猶未可信

史炤釋文曰愍懷謂晉愍帝懷帝也

海陵本同

余謂李泌

正引賈后譖殺愍懷太子遹事通鑑於八十三卷晉

惠帝元康九年紀愍懷手書事甚詳史炤且不能考

豈可釋通鑑以傳世乎

七年韋臯遣三部落總管蘇峯將兵至琵琶山

史炤釋文曰琵琶川地名東奚所居余按琵琶川者東蠻所居蜀之徼外未嘗有奚也炤誤

通鑑二百三十四

凡三條

九年僭軍蹙國

史炤釋文曰僭僵仆也僭軍謂軍不嚴整若僵仆也余謂僭軍者覆軍也軍為敵人所敗顛覆不能復振

若人之顛仆不能復起也

萬榮縱欲跋扈勢何能為

史炤釋文曰扈籬也水居者於水未至為扈水去則大魚跋扈而出小魚獨留余按跋扈之語自漢有之釋者以強梁為言史炤今以大魚跋扈為說夫炤所謂扈者海濱之人於海濱插竹為之其字作滬大魚跋滬東南瀕海之人初無此語中土之人與西北之人安知魚之跋滬而為是語邪炤說可謂僻陋而不

通從彊梁之說為是

十年雲南王異牟尋令崔佐時衣牂柯服而入

史炤釋文曰漢牂柯郡唐為牂州屬江南道羈縻州
牂柯繫船杙也楚滅夜郎軍至且蘭椽船於岸因以
名其處牂柯服謂牂柯人所服也余按史炤止祖述
漢書注言牂柯郡所以得名之由未及唐時所謂牂
柯也新唐書曰牂柯蠻在昆明東九百里東距辰州
二千四百里其南千五百里即交州故通鑑下文載

佐時之言曰我大唐使者豈得衣小夷之服小夷正指牂柯蠻

通鑑二百三十五

凡三條

十二年以渾瑊王武俊並兼中書令

史炤釋文曰渾戶本切本渾沌氏之後

海陵本同

余按渾

瑊鐵勒九姓渾部之後世為臯蘭州都督安得為渾

沌氏之後乎自安史反瑊從其父釋之在兵間父子

各立戰功至德宗時瑊之勞績尤為顯著通鑑蓋屢

書不一書而足史炤前固嘗釋渾瑊矣至此方以為渾沌氏之後何邪又按劉禹錫集有送渾大夫赴豐州詩曰鳳銜新詔降恩華又見旌旗出渾家則渾字讀從上聲無亦其時渾氏功名鼎盛時人不敢言其出於藩落而為之諱遂以為渾沌氏之後邪觀唐世言氏族者本其所自出必各引前世帝王公侯卿大夫士之著見者或以國或以邑或以氏或以謚或以字或以官亦或以名者往往多有傳會今亦無從而

辨正之也二百四十五卷文宗太和八年渾鐵炤釋
同

韋渠牟形神怵慄

史炤釋文曰怵餘招切憂也慄也余按怵音他彫翻
即輕怵之怵

十六年泗州刺史張仵出兵攻埭橋

史炤釋文曰埭橋地名在淮泗一曰道上加土為埭
余按泗水固合於淮然言埭橋在淮泗抑以為在淮

泗之交邪抑以為在淮泗之間邪此等注書胸中實
無定見而持兩端之說而道上加土曰埭又因埭道
而創生此義皆非確論也埭橋在徐州南界唐後置
宿州於此江淮運船所必由之路也二百四十二卷
穆宗長慶二年埭橋註又誤

通鑑二百三十六

凡一條

順宗永貞元年制以積疹未復其軍國政事權令皇太
子純句當

史炤釋文曰疹止忍切久疾也

海陵本同

余按疾疹之疹

音丑刃翻從止忍切乃瘡疹癰疹之疹此疹既以久疾為釋不當從瘡疹癰疹之音二百四十三卷穆宗長慶四年嗜欲勝而疾疹作炤釋又誤

通鑑二百三十七

凡一條

憲宗元和元年阿跌光進本出河曲步落稽

史炤釋文曰阿跌氏其先河曲諸部貞觀初內屬賜姓李余按步落稽即稽胡也自後魏以來已居塞內

其內屬久矣阿跌光進兄弟元和初以軍功賜姓亦非貞觀初也

通鑑二百三十八

凡三條

四年許孟容曰臣為陛下尹京畿

史炤釋文曰天子千里地以遠近言之則言畿也余按史炤徒知以王畿千里釋畿字為是說者屢矣終不足以發明通鑑所書之義按唐以洛陽為東都以河南府汝州為都畿以長安為西京以京兆鳳翔同

華商邠等府州為京畿然此時許孟容為京兆尹自言尹京畿則止言京兆不及他州蓋京兆府以長安萬年兩赤縣為京縣餘縣為畿縣故孟容自云尹京畿也古人之言其取義各有攸當當博考而求其所以言之意固不可膠柱一說以為釋

四年悉甲壓境號曰伐趙

史紹釋文曰悉其兵甲以鎮壓疆境余按譚忠說田季安以伐趙言悉甲壓境謂悉舉魏博之兵以壓趙

境非以鎮壓魏博之疆境也舉兵以臨敵境曰壓炤
釋非

五年伊宥為安州刺史母卒於長安不時發喪鄰士美
先備籃輿即日遣之

史炤釋文曰籃竹也以為輿余按籃輿以竹為之非
竹名也籃輿謂之檐子東南只謂之轎子

通鑑二百三十九

凡五條

七年成德究鄆使者

史炤釋文曰兗鄆二州名余謂兗鄆固是二州名此書成德兗鄆使者言二鎮所遣之使者也王承宗時為成德節度使李師道時為兗鄆等州節度使兗鄆未賜軍號故止稱兗鄆猶田承嗣未賜天雄軍號止稱魏博也通鑑書唐藩鎮或以軍號或以州讀者自審別之可也

八年夏綏節度使張煦

史炤釋文曰夏綏二州名余謂此亦以二州為節鎮

之名猶兗鄆也

十年是時發諸道兵討吳元濟而不及淄青

史炤釋文曰淄青二州名余按淄青與兗鄆共一鎮也李師道承父兄之業有兗鄆淄青曹濮登萊齊密沂海十二州初肅宗置淄青兗鄆二節度使自侯希逸引平盧兵保青州而淄青兼有淄青平盧節度之號自李正己併有兗鄆淄青十五州而兗鄆遂兼淄青平盧之號師道正己之孫也據有十二州於河南

諸鎮最為強大時人或以兗鄆稱之或以淄青稱之或以平盧稱之其實一鎮也二百五十五卷僖宗中和二年淄青亦猶是也

兵將相失心孤意怯難以有功

史炤釋文以心孤為心孤注曰謂心若狐之疑也余以上下文求其義蓋謂兵與將相失則兵士之心孤心孤則意怯以此為說文理甚明順何必以孤為狐曲為之說邪

十一年柳公綽曰京兆為輦轂師表

史炤釋文曰轂輻所湊也唐以京兆為師表謂四方所輻湊也故曰京兆為輦轂師表余按自漢以為京兆者率曰待罪輦轂下蓋謂京師在輦轂之下也言京兆為輦轂師表謂京兆之下以京尹為師表耳下卷十三年輦轂誤同

通鑑二百四十

凡一條

十二年裴度觀築城於沅口董重質帥騎出五溝邀之

大呼而進李光顏與田布力戰拒之賊退布扼其溝中
歸路

史炤釋文曰扼持也謂分布而持扼余按通鑑上下
文布謂田布也非分布之布

通鑑二百四十一 凡六條

十四年劉悟見李公度執手歔歔

史炤釋文曰歔歔歎息貌余按字書歔歔泣餘聲蓋
歔歔者拭涕而收泗之聲非歎息貌二百七十二卷

後唐莊宗同光元年釋獻歆誤同

田弘正與劉悟相見於客亭即受旌節馳詣滑州

史炤釋文曰說文游車載旌析羽註所以精進士卒
節長一尺二寸凡為使者持之余按周禮游車載旌
註云游車木路也析羽五色象其文德也說文曰旌
析羽注旌首所以精進士卒炤釋逸旌首二字遂不
成文理記曲禮武車綏旌德車結旌註云武車兵車
綏謂垂舒之也畫飾也德車乘車結謂收斂之也不

盡飾也正義曰旌謂車上旗幡也兵車尚威武故舒散旗幡垂綏然德車德美在內不尚赫奕故結纏其旒著於竿也兵車謂輦路德車謂玉路金路象路木路既皆有旌特以綏結為別固不專以精進士卒為義又周禮掌節凡邦國之使有虎節人節龍節皆金也以英蕩輔之英蕩函也所以盛節此史炤所謂長尺二寸者也又有符節璽節旌節註云符節如今宮中諸官詔符也璽節者今之印章也旌節者今使者

所擁節是也三禮義宗云節長尺二寸秦漢以下改
為旌幢之形是則後世之節畧如古旌節之制而尺
二寸之節後世不復有矣唐制節度使賜雙旌雙節
行則建節樹六纛是所謂旌節也豈得以古者旂車
載旌節長尺二寸釋唐之旌節乎

邠寧節度使李光顏

史炤釋文曰邠寧二州名余按新唐書方鎮表是年
置邠寧慶三州節度使史特提邠寧二字以為節鎮

之名其例猶淄青魏博鎮冀也二百七十九卷後唐潞王清泰元年辯同

沉酣晝夜獲雜子女

史炤釋文曰獲雜讀為優雜余按樂記曰及優侏儒優雜子女故注云優雜當讀為優雜今通鑑書優雜炤又釋曰讀為優雜何居

穆宗長慶元年瀍為潁王

史炤釋文曰潁于軫切州名余按潁餘頃翻炤音非

劉總奏分幽涿營為一道

史炤釋文曰涿郡也余按古固有涿郡隋唐併漢之燕國涿郡為幽州涿郡天寶元年改幽州涿郡為幽州范陽郡而涿郡遂不見於史況幽營皆州名不應獨釋涿為郡代宗大歷四年范陽節度使朱希彩表析幽州之范陽歸義固安置涿州則劉總所奏者幽州涿州營州欲分為一道非涿郡也

通鑑二百四十二

凡四條

昭義節度使劉悟

史炤釋文曰澤潞藩鎮自劉悟傳至劉正傳三世而滅有州五曰邢汾晉澤潞號昭義節度余按德宗以昭義軍號賜澤潞以寵李抱真非始於劉悟昭義節度領潞澤邢洺磁五州未嘗領汾晉也

起復田布為魏博節度使至魏州號哭而入居于堊室
史炤釋文曰堊烏故切余按堊烏各翻從烏故切非
朱克融焚掠易州涞水遂城滿城

史炤釋文曰涑水名出涿郡余按涑固是涿郡水名以唐時言之涑水則縣名也屬易州涑水縣乃漢涿郡道縣地隋開皇元年以范陽為道更置范陽縣於此地六年改范陽曰固安八年廢十年又置永陽縣十八年改為涑水因涑水以名縣也唐因之

二年軍士日給不過陳米一勺

史炤釋文曰陳米腐米也余謂陳米至腐敗不可食矣陳米謂藏之積年者耳

通鑑二百四十三

凡四條

四年貶李紳為端州司馬張又新等猶忌紳日上書言
貶紳太輕上許為殺之

史炤釋文曰殺所介切削也余詳觀通鑑上文李紳
自戶部侍郎貶端州司馬蓋遠謫也張又新等猶日
言其太輕是欲寘之死地故上許為殺之殺當讀如
字史炤音義殊不可曉

馬存亮自負上入軍中

史炤釋文曰負戴也余謂在首為戴肩背為負

上怪裴度奏狀無平章事以問韋處厚處厚具言李逢吉排沮之狀

史炤釋文曰沮將豫切沮壞也余按字書沮止沮壞之沮音在呂翻炤音之誤辯已見一百四十二卷齊東昏侯永元元年今此字義稍異故復出之

敬宗寶歷二年宣索左藏見在銀十萬兩金七千兩悉貯內藏

史炤釋文曰左藏藏四方所獻金玉珠貝玩好之庫也余按漢官有中藏府屬司農晉少府屬官有左右藏令東晉及宋有外左庫內左庫齊梁陳有右藏無左藏北齊有左右藏令丞屬太府隋唐皆然唐左藏有東都西庫朝堂庫右藏有內庫外庫新唐書百官志左藏署令掌錢帛雜絲天下賦調右藏署令掌金玉珠寶銅鐵骨角齒毛絲畫則左藏庫者藏天下賦調之物非四方所獻也

通鑑二百四十四 凡三條

文宗太和六年李德裕奏修邛崃關

史炤釋文曰邛崃山名在沈黎郡余按漢書地理志
蜀郡嚴道縣有邛崃山嚴道故青衣也漢武帝置沈
黎郡漢光武建武十九年置青衣郡安帝延光元年
置蜀郡屬國都尉新唐書地理志邛崃關在雅州榮
經縣界祝穆曰邛崃關在黎州北九十里黎雅二州
固皆漢沈黎郡地然自漢至唐州縣之建置離合苟

不詳考而言之讀者殊未知漢沈黎郡今為何地也
七年府兵內劇

史炤釋文曰劇字未詳余按字書無劇字今人多讀
為剗音楚限翻

杜牧孫子序漢高祖言指蹤者人也

史炤釋文作指縱注曰縱子用切蕭何傳發縱指示
獸處者人也顏師古注云發縱謂解紲而放之也指
示者以手指示之今俗言放狗余按杜牧注孫子序

及通鑑諸本皆作指蹤顏師古以漢書本皆不為蹤字而讀者乃以為蹤跡之蹤故以發蹤為非而縱讀如字由師古之言而推之則唐人固多有讀發縱為發蹤者今杜牧言指蹤則習唐人之言徑以指示獸蹤為說也依杜牧文義釋之指蹤當讀為蹤跡之蹤若以為指縱音子用切則反害於文義矣使顏師古復生亦必就杜牧文意為之音義必不如史炤之拘泥而入于迂僻也

通鑑二百四十五 凡四條

九年以刑部侍郎兼御史知雜李孝本權知御史中丞
史炤釋文曰御史之職有四知其雜事者謂之知雜
海陵本同余按唐制御史臺侍御史六人久次者一人知

雜事謂之雜端殿中監察職掌進名遷改及令史考
第臺內事額決亦號臺端次一人知公解次一人知
彈分京城諸司為東西次一人知西推贓贖受事號
副端次一人知東推理匭等有不糾舉者罰之次一

人分司東都臺如此則侍御史六人其一人分司東都臺五人在臺院各有其職而知雜者臺院之長史炤言御史之職有四非也

宦者舉軟輿迎上扶升輿決殿後果恩疾趨北出

史炤釋文曰果恩闕前飾果復恩思也臣將入請事於此復思之余按史炤據漢書注而為之釋耳然漢書注所云者闕前果恩也此殿後果恩則不可以臣將入奏事於其下復思之為釋程大昌曰果恩者鏤

木為之其中疏通可以透明或為方空或為連瑣其
狀扶踈故曰呆愚讀如浮思浮思者猶曰髣髴也因
其形似而想其本狀自可見矣呆愚之名既立於是
隨其所施而附著以為之名其在宮闕則為闕上呆
愚臣朝於君至闕下復思所奏是也在陵垣則為陵
上呆愚王莽去之使人無復思漢者是也却而求之
上古則禮經疏屏亦其物也疏者刻為雲氣禽獸而
中空玲瓏也又有網戶者刻為連文遞相綴屬其形

如網也宋玉曰網戶朱綴刻方連是也既曰刻是雕木為之其狀如網耳後世因此遂有直織絲網而張之簷窓以護鳥雀者文宗甘露之變出殿北門裂斷果愚而去是真網也此又沿放楚辭而施網馬者也元微之為承旨時詩曰蕊珠深處少人知網索西臨太液池浴殿曉聞天語後步廊騎馬笑相隨自注云網索在太液池上學士候對歇於此余按網索乃是無壁及有窻處以索掛網遮護飛雀故云網索猶掛

鈴之索為鈴索也宋元獻喜子京召還為學士詩曰
網索軒窓邃鑿坡羽衛重用微之句也泰之言漢陵
闕之杲愚與唐宮殿之杲愚不同其援據詳博故具
述之學者觀之則知為史學者非可守一家之說以
釋前史也

開成元年莊宅收買猶未已

史炤釋文曰唐置莊宅六宅使以諸王所屬為名或
總云十六宅後置六宅余按莊宅使六宅使各是一

官唐玄宗初置十王宅附苑城而居使宦者掌之後
增置為十六宅中世以後置六宅使六宅使掌諸王
第宅之事莊宅使蓋掌田莊及外舍之事此言莊宅
收買未已者謂使莊宅使搜買民間女子以充後宮
也不可以六宅使混雜而為釋蓋此皆內諸司使也
唐之將亡朱全忠誅宦官以所親將統領內諸司使
自此汙于宋朝遂為武散階

二年詔徹樂減膳

史炤釋文曰膳音善具食曰膳膳之言善也余按膳之言善古有此義然未嘗音膳為善膳當讀從去聲

通鑑二百四十六

凡三條

五年李珣坐為山陵使龍輜陷罷為太常卿

史炤釋文曰輜順允切車轉者畫龍其輜也

海陵本同

余

按輜音勅倫翻記天子龍輜鄭玄注曰天子殯以輜車畫龍於輜孔穎達正義曰輜以載柩輜之為狀庫下而寬廣無似龍形惟輜與龍形相類故知畫龍於

轅也史炤音義俱非

正人如松柏特立不倚邪人如藤蘿非附他物不能自起

史炤釋文曰藤藟也蘿莪也余按炤以蘿為莪是據毛詩傳詩菁菁者莪傳曰莪蘿蒿也然此非蘿蒿之蘿乃蒿與女蘿之蘿能引蔓者也

武宗會昌四年張仲武為東面招撫回鶻使奚契丹室韋等並自指揮

史炤釋文曰室韋契丹別種東胡之北邊蓋丁零之
苗裔也余按史炤既曰室韋契丹別種又曰丁零苗
裔蓋引李延壽宋祁兩家之說李延壽北史曰室韋
蓋契丹之類在南者為契丹在北者為室韋宋祁新
唐書曰室韋契丹別種東胡北邊蓋丁零苗裔也就
李延壽之說則以為契丹之類宋祁之說則持兩端
矣契丹丁零本非同種契丹本東胡鮮卑種丁零在
匈奴北夷狄荒忽史亦莫究其先之所由來也

通鑑二百四十七

凡一條

三年鄖公李抱真

史炤釋文曰鄖城名在東海余按鄖春秋時小國後為小邾唐以古國名封李抱真為公耳

通鑑二百四十八

凡一條

宣宗大中二年王皞曰憲宗厭代之夕事出曖昧

史炤釋文曰厭於琰切厭魅也謂惡夢余謂厭代者謂升遐言厭薄人間之世棄之而上仙也厭當音於

艷翻若厭魅之厭與惡夢而魘者其字義亦各不同
史炤引之以釋厭代之厭誤矣

通鑑二百四十九

凡三條

十年上曰鄭光殫我不置

史炤釋文曰殫大計切極也余按字書懣音大計切
極也殫音呼計翻此言殫我者謂有所負恃以事干
請不得所欲不止者也

十二年王式至交趾樹芳木為柵可支數十年

史炤釋文曰芳都聊切又音調

海陵本同

余按音調及都

聊切廣韻以為葦花其字從艸從刁又類篇有從艸

從力者以為香菜音歷得切芳芳既皆艸名必不可

以為柵新書王式傳作芍木字書芍陟畧翻芍藥香

艸也不云木名趙魏之間謂棘為勢勢音六直翻王

式之先家於太原其父起多居河中廬於中條山得

無因趙魏之言以棘為勢乎艸本從艸得無傳寫之

誤以棘為艸遂為芳字乎

十三年鄆王為皇太子仍更名淮

史炤釋文曰淮徂回切余謂淮音七罪翻

通鑑二百五十凡三條

懿宗咸通元年王式命望海鎮將雲思益浙西將王克
容將水軍巡海滌

史炤釋文曰說文滌埤增水邊土人所止者余按史
炤此說亦由廣韵來通鑑所謂巡海滌者巡邏海瀕
耳顧野王曰滌水邊地朱元晦曰滌水涯也說較簡

而明

六年諸道進私白者閩中為多

史炤釋文曰閩中南越中地余按南越之地唐為嶺南五管唐之閩中福建觀察使所管也一百六十六卷梁敬帝紹泰元年一百六十七卷陳武帝永定元年皆有此誤今以唐之疆理辯而申之

七年南詔以范胥些為安南都統

史炤釋文作胥些注曰董衝云胥未詳余考通鑑諸

本及唐書皆作𤄎些若以字求之則𤄎音厯質翻

通鑑二百五十一 凡二條

九年高郵岨峻而水深狹

史炤釋文曰高郵邑名屬兖州余按高郵縣自漢以來皆屬廣陵隋改廣陵為江都郡又改為揚州唐書地理志高郵縣亦屬揚州史炤以為屬兖州何也晉氏南度迄于梁陳於廣陵置南兖州炤之所謂屬兖州無亦以此為據邪但南兖州不可以為兖州晉宋

齊梁陳之疆理不可以釋唐之疆理釋通鑑者當隨
事隨時考其建置離合沿革也

賊以千緜贈張敬思

史炤釋文曰緜并絲繒余謂史炤據說文以為說也
唐制以布帛四丈為匹亦謂匹為緜所謂千緜者千
匹也非并絲繒

通鑑二百五十二

凡六條

十一年立戰棚具礮櫓

史炤釋文曰橐盧堆切機石之架也余按礮機石也
橐橐木也音盧對翻橐木者自城上下之以壓敵非
機石之架也

蠻合梯衝四面攻成都城上以鉤縲挽之使近投火沃
油焚之

史炤釋文曰縲胡貫切絡也又下究切維也一曰旗
紐一曰槌耳

海陵本同

余按縲音于善翻又胡眈翻匝轉

索頭如環所謂彊絙也前施大鉤故曰鉤縲廣韵從

胡慣切者縞文也非此義既曰鈎繅亦非旗紐與槌耳也

東蠻苴那時勿鄧夢衝三部

史炤釋文提起苴那二字注曰東蠻部落名余按東蠻三部皆德宗朝韋臯帥蜀時招與共禦吐蕃者苴那時一部也勿鄧一部也夢衝一部也若曰苴那則以勿鄧為時勿鄧矣炤釋非

僖宗乾符元年王凝崔彥昭同舉進士凝先及第嘗叔

衣見彥昭

史炤釋文曰袂衣楚懈切博雅稍袷袷謂之褱褱余
按史炤此釋全不可曉質以字書稍袷也袷執袷也
袷衣襟也褱際也褱亦衣襟褱際也褱無其字今褱
密之褱從示不從衣爾雅衣褱謂之視郭璞注曰衣
褱也齊人謂之褱或曰袷衣之飾孫奭等釋曰此郭
氏兩解一云衣褱也本亦作褱方言曰褱謂之袷即
衣衿也與字書略同又類篇曰方言稍謂之袷博雅

祔衽謂之褻衽而史炤之所引既誤以祔為袷衽為
祕又於衽衣之義無所發明炤於四十二卷漢光武
建武六年引博雅以釋槽櫪一百三十六卷齊武帝
永明三年引博雅以釋眊與此釋衽衣不過務求艱
僻以罔世耳何則衽衣二字今人所常言也凡交際
之間賓以世俗之所謂禮服來者主欲從簡便必使
人傳言曰請衽衣客於是以便服進又有服宴褻之
服而過服交際之服者必謝曰衽袒無禮可見衽衣

之語起於唐人而通行於今世也稍粘衽謂之襍衽
豈衽衣之謂乎

三年高駢築成都羅城蜀土疏惡以甃甃之

史炤釋文曰甃甃甃甃井甃余謂甃甃今之甃高駢
以蜀土疏惡陶甃以甃成都之城甃砌也南人率謂
以甃甃地曰甃砌易曰井甃无咎馬注云為瓦裹下
連上也子夏傳云修治也于云以甃壘井曰甃是皆
以甃砌為義炤以甃城為井甃則又不通矣

無得為坎埴以害耕種

史炤釋文曰坎埴高下也余按字書埴坎旁入也又曰埴小坎也易入于坎窞陸德明引說文曰坎中更有坎曰窞史炤所謂高下非坎埴之義也

通鑑二百五十三

凡四條

四年南詔遣陀西段璿寶等來請和

史炤釋文作璿字注云按董衝云未詳

海陵本同

余按通

鑑乃璿字新唐書作璿字蓋傳寫唐書者誤以王旁

差為王旁羌而董衝又誤為王旁羌也若從瑳字音
七何翻

王郢東至明州劉巨容以筒箭射殺之

史炤釋文曰筒徒紅切竹名

海陵本同

余按唐制武舉有

筒射今軍中亦有之筒射之箭長纔尺餘剖筒之半
長與常弓所用箭等留二三寸不剖為筈以傳弦內
箭筒中注箭弦上筒旁為竅穿小繩繫于腕殼弓既
發豁筒向手背激矢射敵中者洞貫所謂筒箭也

五年李克用進擊寧武及岢嵐軍

史炤釋文曰岢嵐山名也近太原余按唐書地理志
嵐州嵐谷縣有岢嵐軍實華曰岢嵐山在嵐州宜芳
縣西北元豐九域志岢嵐軍太平興國五年以嵐州
嵐谷縣建軍南至嵐州九十里嵐州東南至太原一
百八十五里九域志所載道里以太原府徙治後言
之也其距太原不為近矣

六年張錯郭晁帥行營兵攻東陽門

史炤釋文曰咄敷尾切余按字書咄敷尾切旁從月
咄字旁從日音滂佩翻又普罪翻又普沒翻

通鑑二百五十四

凡一條

廣明元年鄭畋悶絕仆地斃傷其面

史炤釋文曰斃并斃余謂斃并斃炤之誤猶前之誤
也蓋以斃斃地畋悶絕而仆故傷其面

通鑑二百五十六

凡二條

光啓元年朱敬玫留荆南嘗曝衣

史炤釋文曰曝薄報切說文晞也余按曝字即孟子一暴十寒秋陽以暴禮記欲暴巫尪列子自曝於日之曝音步木翻

二年李克修攻孟方立拔故鎮武安臨洺邯鄲沙河

史炤釋文曰邯鄲屬惠州余按唐志惠州本磁州至天祐三年以磁慈聲一更名惠州然史家只書磁州不書惠州蓋後唐以天祐三年政在朱氏但仍唐世磁州之名而不用朱全忠所改惠州也二百八十四

卷晉齊王開運二年邯鄲注亦誤

通鑑二百五十七

凡二條

二年廣陵城中無食以堇泥為餅食之

史炤釋文曰堇居隱切又音芹草名爾雅謂之藟苦

今堇葵也

海陵本同

余按堇泥黏土也二百六十七卷梁

太祖開平元年劉仁恭用堇泥為錢炤釋云黏土至

二百六十九卷均王禎明元年又誤

呂用之給楊行密曰用之有銀五萬錠

史炤釋文曰鉶待鼎切說文銅鐵樸也余按此言銀
鉶也今人治銀大鉶五十兩中鉶半之小鉶又半之
世謂之鉶銀非銅鐵樸之謂也

通鑑釋文辯誤卷十一

欽定四庫全書

通鑑釋文辯誤卷十二

宋 胡三省 撰

通鑑二百五十八

凡三條

昭宗大順元年李存孝擒孫揆韓歸範紆以素練

史炤釋文曰紆其字未詳

海陵本同

余按丁度集韻紆音

充夜翻以繩維持之也二百六十九卷梁均王乾化

四年紆音昌者切亦非

惟華邠鳳翔廊夏之兵會之

史炤釋文郎作鄆注曰吉掾切地名余按通鑑言諸鎮之兵會伐李克用者也華者鎮國軍之兵也邠者靜難軍之兵也鳳翔者岐隴之兵也鄜者保大軍也夏者定難軍也通鑑前書張濬會宣武鎮國靜難保大定難諸軍於晉州可以見矣史炤以鄜為鄆不考故爾鄜音夫

二年成都軍民強弱相陵將吏斬之不能禁乃更為酷法或斷腰或斜劈

史炤釋文曰劈博厄切分也

海陵本同

余按音博厄切者

乃劈字其字下從手不從刀從刀者音普壁翻剖也

通鑑二百五十九

凡一條

乾寧元年劉建鋒馬殷引兵至澧陵

史炤釋文曰澧陵楚地余按唐書地理志醴陵縣屬

潭州澧當作醴史炤以其地在戰國時屬楚邪自秦

罷侯置守之後不當單引戰國地理以釋唐時州縣

以馬殷後封楚王遂以其地為楚地邪則此時劉建

鋒主兵馬殷特偏將耳且其兵方至醴陵未得湖湘塊土其地既未屬馬殷殷又未受封為楚王可遽以醴陵為楚地乎其義例不明有如此者

通鑑二百六十 凡一條

二年上曰就使沙陀至此朕自有以枝梧

史炤釋文曰梧五故切斜相抵觸也余按唐昭宗所謂枝梧者正引漢書諸將惛伏莫敢枝梧之枝梧為說如淳漢書注曰枝梧猶枝杵也臣瓚曰小柱為枝

斜柱為梧今屋梧斜柱也未嘗以斜相抵觸為義枝梧皆讀如字

通鑑二百六十一 凡二條

四年朱友恭攻黃州瞿章棄城南保武功寨

海陵本釋文作瞿章注云瞿直格切姓也又音狄余考通鑑上下文乃瞿章非翟章也瞿音其俱翻

葛從周奔還楊行密追之及於淝水

史炤釋文曰淝音計普賣二切水在丹陽

海陵余按本同

類篇潯音必至翻水名在弋陽今潯河在來遠鎮西
十里來遠鎮即東正陽也東至壽州二百里史炤音
釋俱非也

通鑑二百六十二

凡一條

天復元年王珂遣間使告急於李克用

史炤釋文曰間使間諜之使費本同余謂敵兵斷道遣

使者投間道而行謂之間使非間諜之使也此後多

有以間使為間諜者不欲俟數觀者詳之

通鑑二百六十三 凡一條

二年削漬松栳以飼御馬

史炤釋文曰栳鉏里切

海陵本同

余按音鉏里切者果名

松栳之栳音孚吠翻斫木札也時鳳翔受園積久芻

竭故削松栳令薄漬以飼馬詳考字書果木之栳今

人作柿乃木札之柿字也從孚吠切木札之柿今人

作柿乃果名之柿字也從鉏里切炤音之誤頗亦由

此二百八十卷晉高祖天福元年二百九十三卷周

世宗顯德四年削枋音皆誤

通鑑二百六十四 凡六條

三年李克用笑曰賊欲有事淄青

史炤釋文曰淄青並州名屬河南道余按炤釋淄青
與二百三十三卷憲宗元和十年二百五十五卷僖
宗中和二年釋淄青之誤同而更添屬河南道四字
夫淄青之屬河南道是唐天寶以前十道按察採訪
使所統自分建藩鎮而淄青自為一道號平盧節度

使李克用言賊欲有事淄青者時平盧節度使王師
範舉兵襲取朱全忠之兗州克用知全忠將攻師範
故云爾

成汭作巨艦齊山截海劈浪之類甚衆

史炤釋文曰劈匹歷切破也又博厄切分也費本同余

謂從匹歷切為是辯已見前

李嗣昭等復取振武城殺吐谷渾降者二千餘人

史炤釋文曰吐谷渾西域國居甘松山之陽洮水之

西余按吐谷渾自高宗時為吐蕃所破舉國內徙其國之故地盡入吐蕃此時吐谷渾多居代北不復在甘松山之陽洮水之西矣

天祐元年陳班貶湊州司戶

史炤釋文曰湊千侯切又則侯切余按新舊唐書地理志無湊州湊當作湊貞觀十六年開山洞置湊州
湊州時屬黔中節度使然湊字亦無千侯切一音

朱全忠表稱邠岐兵逼畿甸請上幸洛陽

史炤釋文曰天子千里地曰畿天子五百里曰甸余按禹貢天子五百里甸服孔安國注云規方千里以爲甸服去王城面五百里面五百里則自東至西千里自南至北亦千里王畿千里以四方言之甸服五百里以一面言之畿卽甸也非有千里五百里之殊若周禮夏官九畿之籍方千里曰國畿則王畿也禹貢之甸服也其外方五百里曰侯畿又其外方五百里曰甸畿侯畿則禹貢之侯服也若甸畿已爲禹貢

綏服周官之甸畿非畿甸之謂也

皇后出自捧玉卮以飲全忠

史炤釋文曰卮古字作觥飲酒器也余按觥有稜之器也卮圓器也古字未必以卮為觥蓋炤以為觥卽卮字誤作觥耳炤又曰古以角作觥受三升審觀炤釋蓋襲用應劭漢書注而不能盡用之也劭云卮飲酒禮器也古以角作受四升古卮字作觥鄭玄禮器注凡觥一升曰爵二升曰觥三升曰觶四升曰角五

升曰散史炤謂祗受五升既與應劭異抑以鄭玄所謂禪者為祗與然後世之玉卮非古之祗也

通鑑二百六十五

凡二條

泌陽劉存

史炤釋文曰泌陽縣名屬泌縣余按炤既曰泌陽縣名矣不應又曰屬泌縣是必曰屬泌州而誤作屬泌縣也然泌州本昌州治棗陽唐武德五年改為唐州天祐三年朱全忠徙治泌陽表更名泌州此時唐州

未改為沁州不當以沁陽屬沁州為釋歐史職方考
只書唐州

昭宣帝天祐二年封皇弟禔為潁王

史炤釋文曰禔時爾切余按溫公注揚子禔以支翻
又音題未嘗從時爾切

通鑑二百六十六

凡六條

梁太祖開平元年梁王入館于魏魏博節度使羅紹威
恐王襲之

史炤釋文曰魏博唐之藩鎮也節度貝博魏相磁洛

衛七州治魏州

海陵本同

余按唐代宗廣德元年平史朝

義以田承嗣為魏博德滄瀛五州都防禦使是年夏
五月丁卯制分河北諸州以魏博德為魏州管此藩
鎮之始也大歷七年魏博節度使田承嗣表分魏州
置澶州八年昭義節度使薛嵩薨承嗣襲取相貝洛
衛磁詔諸鎮討之盧子期之敗磁州復歸于昭義而
淄青李正己取德州遂為已有承嗣所有者魏博貝

相遭衛沼七州田悅之敗沼州復歸于昭義自此世襲更史氏何氏樂氏羅氏皆保有六州故羅紹威之悔誅牙兵謂人曰合六州四十三縣鐵不能為此錯安得七州哉

山後八軍巡檢使李承約

史炤釋文曰山後八軍謂涿營瀛莫平薊媯檀皆屬

盧龍節度使盧龍乃幽州范陽郡也

海陵本同

余按涿營

瀛莫平薊媯檀此盧龍巡屬八州非山後八軍也涿

營瀛莫平薊皆在山前惟媯檀在山後又有新武二
州與媯檀為四州置八軍以備契丹河東故有山後
八軍巡檢使盧龍古塞名在平州肥如縣燕慕容令
所謂守肥如之險者也唐武德初改肥如為盧龍縣
後置盧龍軍於其地尋又以范陽節度使為盧龍節
度使而治幽州盧龍之地非幽州范陽郡地也若曰
盧龍節度使治幽州范陽郡則可矣

朱全昱睨帝曰朱三汝本碭山一民也

史炤釋文曰碭山秦之碭郡在唐為宋州余按漢書地理志梁國故秦碭郡顏師古注曰以有碭山故名碭郡漢初置梁國都碭後都睢陽應劭曰碭山在碭縣東括地志曰碭山縣本漢碭縣在宋州東一百五十里是則碭山縣唐屬宋州不為宋州也宋州治睢陽唐志云光化二年朱全忠以碭山虞城單父曹州之成武表置輝州則碭山縣此時屬輝州矣

以養子宣武節度副使友文為開封尹

史炤釋文曰宣武節鎮本治宋州梁徙于汴州

海陵本同

余按唐肅宗乾元二年置汴滑節度使治滑州上元二年廢寶應元年復置河南節度使治汴州代宗以田神功為汴宋節度使亦治汴州大厯中李靈曜作亂於汴州命淮西節度使李忠臣等討平之因命忠臣以淮西節度治汴州德宗建中二年分宋毫潁別為節度使以宋州刺史劉洽為之治宋州尋號宣武節度使此宣宋節度治宋州之始也至興元二年劉

洽破李希烈得汴州遂徙治焉自此迄于唐亡宣武
節度皆治汴州未嘗徙也及梁受唐禪定都汴州乃
復徙宣武節度于宋州而汴州置開封尹史炤殆未
嘗深考本末也

以權知荆南留後高季昌為節度使

史炤釋文曰高季昌字賂孫陝州陝石人余按五代
史高季昌字賂孫非字賂孫也陝州峽石人非陝石
也

二年晉兵猶屯余吾寨

史炤釋文曰余音餘又音徐余吾水名在朔方即其

地以為寨

海陵本同

余按漢書朔方有余吾水時晉兵救

上黨而屯余吾寨炤指朔方之余吾水為註計其地
之相去無乃太遠漢書地理志上黨郡有余吾縣章
懷太子賢注曰余吾故城在今潞州屯留縣西北晉
兵所屯正此地也

通鑑二百六十七

凡三條

三年岐王置翟州於郿城

史炤釋文曰翟直格切余謂翟當讀為狄春秋戰國時岐梁涇漆之北皆戎狄之地岐王置翟州蓋取諸此

劉守文以重賂招誘契丹吐谷渾之衆

史炤釋文曰吐谷渾乞伏乾歸之苗裔自後魏以來名見中國居於青海之上焉余按吐谷渾徒河鮮卑慕容涉歸之庶長子晉時度漠而西居於青海之上

其後遂以為部落之名自晉以來通鑑書吐谷渾屢
矣史炤前此釋文亦言其出于鮮卑慕容氏於此忽
以為乞伏乾歸之苗裔乞伏乾歸據河隴在東晉太
元間當是時吐谷渾立國久矣烏得以為乞伏乾歸
之苗裔乎炤釋前後牴牾大率如此又按高宗之世
吐谷渾為吐蕃所破徙鄯州尋徙靈州唐為置安樂
州以處之後吐蕃復取安樂州而殘部徙朔方河東
今劉守文所招誘者河東管內雲朔等州之吐谷渾

也不在青海之上

四年晉王遄臥帳中張承業褰帳撫王曰此豈王安寢時邪

史炤釋文曰褰帳說文絢也余按說文所謂褰絢蓋因春秋傳徵褰與襦而有此說張承業褰帳言褰開晉王所臥之帳耳安可以褰絢為釋

通鑑二百六十八

凡四條

梁太祖乾化元年南平襄王劉隱病亟

史炤釋文曰亟紀力切敏疾也又去吏切余按禮記夫子之病革矣革讀與亟同病亟言病勢危急也不當以敏疾為釋若去吏切之亟數數也愈非病亟之義史炤大抵只據廣韻為釋文更不尋繹通鑑文義其敝至此

二年帝夜遁旦至冀州脩之耕者皆荷鋤奮梃逐之

史炤釋文曰梃木片余按此即孟子所謂制梃以撻秦楚之堅甲利兵之梃梃者杖也豈木片之謂乎此

亦信用廣韻之過也

博王友文來朝請帝還東都

史炤釋文曰朝請才性切余謂朝請之請漢書固音才性翻然通鑑書博王友文來朝朝字當句斷請帝還東都請當讀如字朝字屬上句請字屬下句文理曉然史炤惟不知句讀遂并文理失之是後二百七十一卷均王禎明五年林思謬來朝請幸所治炤亦以朝請釋之其誤同

均王乾化三年徐溫曰浙人輕而怯

史炤釋文曰江水東至會稽山陰而折故吳會之地

因以稱浙

海陵本同

余按浙江上游受衢婺歙三港之水

水出兩山之間盤迴百折至錢塘而入海故謂之浙

江越婺衢台明溫處七州為浙東杭蘇常潤秀湖睦

為浙西此唐末所分也錢氏時跨有兩浙故徐溫謂

其兵為浙人若云江水東至會稽山陰為浙江此漢

桑欽水經之說至唐已分山陰西界置蕭山縣浙江

過蕭山入海太史公謂吳為江南一都會故後人謂
吳為吳會今蘇州是其地也吳會之地固亦屬兩浙
不得顓稱為浙也或以吳會指言漢吳郡會稽之地
然漢會稽之地兼有七閩七閩之地唐為福建觀察
使所統唐末為威武軍節度使所統非浙也

通鑑二百六十九

凡一條

禎明元年劉鄩引兵自黃澤西去道險士卒援藤葛而
進

史炤釋文藤作勝注曰勝詩證切苴勝胡麻也余按
胡麻今人皆種之其根淺手可擢而拔豈可援以登
險乎山路多藤葛故劉鄩之卒援以登險道藤音徒
曾翻

通鑑二百七十

凡四條

四年嚴可求以厚利募贛石水工故吳兵奄至虔州城
下

史炤釋文曰吉州有贛石山遂興水與虔州相近

海陵

同本余按虔州之贛水自州治後北流一百八十里至吉州萬安縣界為灘十有八怪石如精鐵突兀廉厲錯峙波面俚俗謂之贛石非山名也水工生長於其地習知灘險熟於操舟然後無觸破覆沒之患故以厚利募之以行舟若山則安用水工哉

以忠義節度使高萬興兼保大節度使并鎮鄜延

史炤釋文曰鄜延並州名余按唐末以鄜州為保大軍延州為保塞軍梁改保塞軍為忠義軍則鄜延二

州為二鎮矣

李嗣源見晉軍橈敗

史炤釋文曰橈火高切其字從手

海陵本同

余按橈字從

木音奴教翻勢屈為橈左傳所謂師徒橈敗音義正如此

五年賀瓌攻德勝南城設睥睨戰格如城狀

史炤釋文曰睥睨表視也

海陵本同

余按城上短垣謂之

睥睨非表視之睥睨也通鑑下文言如城狀可以知

矣

通鑑二百七十一 凡一條

六年趙王鎔雍容自逸事皆仰成於僚佐

史炤釋文曰仰恃也余按仰成之語本於書畢命周康王垂拱仰成乃是康王以父師優禮畢公自言以冲幼而仰成於耆壽俊之意如左傳所謂百穀仰膏雨漢書所謂氏首仰給其義皆同非恃也

通鑑二百七十二 凡三條

後唐莊宗同光元年王彥章引兵踰汶將攻鄆州

史炤釋文曰汶水出兗州茌蕪縣余按汶水發源於茌蕪縣原山西南流過鄆州中都縣東北中都今為汶上縣距鄆州九十餘里王彥章引兵踰汶水其地在中都東北不在茌蕪

帝發中都舁王彥章自隨

史炤釋文曰舁羊諸切共舉余按以車載人前挽後推亦謂之舁其義固不專於共舉也

高季興入朝上從容問曰朕欲用兵於吳蜀二國何先
史炤釋文曰從容休燕也余按朝廷之儀君臨之以
莊臣承之以敬若從容顧問則氣象安舒上下之情
親密無間上則不峻不迫下則不陵不遽是所謂從
容也何必休燕然後為從容哉

通鑑二百七十三

凡一條

三年張全義以羅貫高仇怨之

史炤釋文曰仇高極也余按亢字則有高極之義此

伉字之義敵也羅貫之為人必氣貌峻厲言語彊直
其事上也如敵已然故張全義以其高伉而惡之

通鑑二百七十四

凡三條

長和驃信鄭昊

史炤釋文曰驃信南詔也余按唐末南詔改國號曰
長和其君曰驃信長和者南詔也驃信者南詔之君
也

澄陽張礪

史炤釋文曰潯陽縣名屬惠州余按唐滅梁復以惠州為磁州

孫鐸曰賊既勢挫必當離散然後可撲討也

史炤釋文曰撲掌也余按撲討之撲擊也以為掌何義

通鑑二百七十五 凡一條

明宗天成元年入洛拾莊宗骨於灰燼之中而殯之

史炤釋文曰殯殮也余按古禮斂自是斂殯自是殯

自天子至諸侯卿大夫士皆有小斂大斂若殯則菆塗也炤釋以殯殮同義亦以廣韻為據考之於記檀弓子思之言曰喪三日而殯凡附於身者必誠必信則殯似有殮義孔穎達疏以為此士大夫之禮蓋亦因小斂大斂然後殯致疑也唐自許敬宗等去國卹篇天子之喪禮隨時斟酌損益就簡便而為之况五季之時邪

通鑑二百七十六

凡三條

金史四庫全書 卷十二
三年高從嗣請與馬希範挑戰

史炤釋文曰挑徒弔切余按挑戰之挑徒了翻

四年吳武昌節度使李簡以疾求還江都卒于採石

史炤釋文曰採石一名牛渚山在丹陽縣北大江中

唐改縣曰當塗余按漢書地理志丹陽縣屬丹陽郡

當塗縣屬九江郡禹會諸侯於塗山即其地在濠壽

之間永嘉喪亂淮民南度晉成帝立當塗縣於于湖

縣以處僑民其後遂為實土唐貞觀八年省丹陽縣

入當塗當塗有縣其來尚矣非唐改丹陽為當塗也
徐知誥召徐知詢飲以金鍾酌酒賜之知詢疑有毒引
它器均之跽獻知誥知誥不肯受伶人申漸高徑前為
俳諧語掠二酒合飲之

史炤釋文曰合葛闔切兩龠為合

費本同

余按史言申

漸高掠取金鍾及它器之酒合而飲之安取兩龠為
合之義哉

通鑑二百七十七

凡一條

長興元年董璋姚洪令壯士十人刳其肉

史炤釋文曰刳刺也余謂刳割也非刺也

通鑑二百七十八 凡二條

三年幽州奏契丹屯納蘭泊

史炤釋文曰納蘭泊地名近幽州

海陵本同

余按歐陽公

四夷雜錄時幽州有備契丹主西徙橫帳居納蘭泊

出寇雲朔之間則納蘭泊在雲朔塞外不近幽州也

四年閩薛文傑陰求富民之罪被榜箠者曾背分受仍

以銅斗火熨之

史炤釋文曰熨於胃切余按楊堅執周政李穆使人
奉熨斗於堅曰願持此以尉安天下則熨字有尉音
但今人讀熨字多音紆物翻

通鑑二百七十九

凡一條

潞王清泰元年王以西都留守王思同當東出之道尤
欲與之相結說以利害餌以美妓不從

史炤釋文曰餌餌之也余謂此言餌者取釣餌之義

釣者以餌引魚而鉤致之史言潞王餌王思同正此義也

通鑑二百八十

凡二條

後晉高祖天福元年唐主夜與近臣從容語

史炤釋文曰從容猶內燕也余按史炤多以從容為間燕已辯之於二百七十二卷後唐莊宗同光元年至此又以從容為內燕矣

薛文遇曰諺有之當道築室三年不成

史炤釋文曰諺猶傳言也余謂諺者今人所謂俗語也

通鑑二百八十一 凡三條

二年張從賓引兵東扼汜水關

史炤釋文曰汜水縣有虎牢關成臯關旋門關余按漢之成臯周之虎牢也穆天子傳云七萃之士生捕虎以獻天子天子畜之東虢命曰虎牢春秋城虎牢以偏鄭即其地劉項相拒於成臯扼虎牢之險也唐

初秦王世民守虎牢以破竇建德是雖縣曰成臯而虎牢之名猶在唐改成臯縣為汜水縣新唐書地理志注曰縣有虎牢關成臯故關旋門關旋門關在成臯縣西旋門坂酈道元所謂陟此阪而東趣成臯者也自此東至板城渚口為成臯關成臯關即虎牢關也所謂故關者先時所立之關也曰故關者史表言其有新關耳成臯縣即改為汜水縣關亦改呼為汜水關

王暉殺安遠節度使王瓌

史炤釋文瓌作瓌注曰思將切余按通鑑諸本皆作
瓌字音古回翻

行軍司馬張肫

史炤釋文曰肫敷尾切又滂佩切余按字書敷尾之
肫其旁從月滂佩之肫其旁從日若依炤釋兼兩音
是以肫肫為同一字也

通鑑二百八十二

凡三條

四年以唐許王從益為郇國公

史炤釋文曰郇地名在河東解縣余按此以古國名封從益為公使奉唐明宗之祀而已非使其地也五年楚王希範自謂伏波之後

史炤釋文曰漢馬援封伏波將軍余謂伏波將軍而言封史筆有此義例否其鄙陋無識槩可見矣

安審暉敗唐兵於雲夢澤中

史炤釋文曰雲夢二澤名在楚地余按禹貢雲土夢

作又孔安國注云雲夢之澤在江南左傳楚王以鄭
伯田江南之夢杜預注云楚之雲夢跨江南北漢書
地理志雲夢澤在南郡華容縣南祝穆曰據左傳邛
夫人弃子文於夢中言夢而不言雲楚子避吳入于
雲中言雲而不言夢則知雲夢二澤也漢陽志亦云
雲在江之北夢在江之南此皆以二澤為說者也又
安陸有雲夢澤枝江有雲夢城蓋古之雲夢澤甚廣
而後世悉為邑居聚落故地之以雲夢得名者非一

處安審暉敗唐兵於雲夢澤即安陸之雲夢澤非古
之所謂雲夢二澤也

通鑑二百八十三

凡三條

七年同鄜援兵繼至

史炤釋文曰同鄜二州名余謂同鄜二州自唐末以
來同州為匡國軍鄜州為保大軍已為二鎮矣

齊王天福八年楚王希範好自誇大為長槍大槊飾之
以金可執而不可用

史炤釋文曰通俗文剡木傷盜曰槍余謂凡注書者
發明正文大義使讀者因而求之無所凝滯也如炤
此注於大義為何如哉

開運元年河決浸汴曹單濮鄆五州之境

史炤釋文曰單時戰切余按單州因單父縣以名州
單音善從去聲者蜀人土音之訛也

通鑑二百八十五 凡一條

吳越程昭悅譖闕璠杜昭達謀奉錢仁俊作亂下獄鍛

鍊成之

史炤釋文曰鍛鍊爍冶金也余謂炤於此語之下更有以喻成獄也一語文意方足古人謂以獄辭成人之罪者曰鍛鍊其引喻之義甚精蓋冶金者既爍之以火又淬之以水鍊之以錘而後能成器舞文巧詆之吏其訊囚也威之以笞箠木索質之以參伍證佐或弛或張或緩或急以困之使答辯者變意易辭惟其所欲以成獄故比之鍛鍊

通鑑二百八十六

凡一條

後漢高祖天福十二年奚王伊刺

史炤釋文曰拽以制切刺奴八切余謂拽羊列翻刺

郎葛翻

伊刺舊作拽刺今按遼史國語解改正
史炤胡三省翻切係屬舊名姑存之

通鑑二百八十七

凡一條

李廷珪將兵出子午谷以援長安

史炤釋文曰三秦記子午長安正南山名秦嶺谷一

名樊川余按樊川以漢高祖封樊噲而得名其地正

直唐長安城南此則平川也言自樊川入子午谷則可以子午谷一名樊川則不可

通鑑二百八十八

凡二條

乾祐元年羌族啜母殺綏州刺史李仁裕

史炤釋文曰啜其字未詳

海陵本費本同

余按龍龕手鏡啜

音夜

蜀眉州刺史申貴擊漢箭苦安都寨破之

史炤釋文曰箭末曰苦苦會也謂與弦相會通作括

費本同

余謂箭筈嶺名有箭筈關在鳳翔西南界上宋高宗紹興元年金將沒立即君自鳳翔攻箭筈關吳玠遣將擊退之蓋亦蜀口關隘處史炤蜀人也不知箭筈之為地名而汎言箭筈訓義可見其孤陋寡聞矣

通鑑二百八十九

凡一條

三年馬希萼賜希廣死彭師曷葬之瀏陽門外

史炤釋文曰瀏陽縣名屬潭州余謂潭州固有瀏陽

縣而劉陽門則潭州城門名也不當以縣名為釋自
潭州城出劉陽者謂之劉陽門出醴陵者謂之醴陵
門

通鑑二百九十 凡一條

周太祖廣順元年劉崇即皇帝位於晉陽

史炤釋文曰劉崇自太原以北有州十余按通鑑書
劉崇有并汾忻代嵐憲隆蔚沁遼麟石十二州之地
史炤言有州十是以歐史職方考為據而忘通鑑下

文也汾石二州在太原西南遼沁二州在太原東南
劉崇疆土亦不止於自太原以北也

通鑑二百九十一 凡四條

二年南漢將潘崇徹破王逵于蠓石

史炤釋文曰蠓字未詳

海陵本同

余按蠓音豪附石而生

韓愈所謂蠓相粘為山者也生於海中者亦謂之礪
王峻爭之不已

史炤釋文曰爭則迸切通作諍余謂爭讀如字文理

自通

帝猶愍之

史炤釋文曰愍眉殯切憐也余謂愍讀與閔同音隕翻不從去聲此亦炤土音之訛

顯德元年契丹通事楊耨姑舉城降

史炤釋文曰耨乃豆切余以西北土音求之耨當音奴篤翻

通鑑二百九十二 凡二條

二年蜀將趙玘舉秦州城降

史炤釋文玘作玘注曰淺氏切又千禮切余按通鑑諸本皆作玘當音蒲眠翻又毗賓翻

帝至壽春城下營于淝水之陽

史炤釋文曰淝水出九江山入淮在廬州合肥縣費本

同余按淝水出九江良餘山過合肥縣又過壽春城

北而入于淮淝水去壽春城纔二里耳世宗下營正在此水之陽史炤但以應劭漢書注肥水至合肥與

淮合之說為據而不考世宗所營之地不在合肥也

通鑑二百九十三

凡一條

三年唐孫晟謂王崇質曰吾思之熟矣終不負永陵一培土

史炤釋文曰培鋪枚切瓦未燒者按漢書張釋之傳云長陵一杯土顏師古注曰音步侯切手掬也其字從手或讀為杯非也又按培字當作杯意同而兩音當互讀也余按瓦未燒之培當作坯字與手掬之杯

音既不同而意義亦不同也況張釋之所謂取長陵
一抔土意謂發陵惡察察言故曰取一抔土孫晟所
謂終不負永陵一培土言將以死報唐不負其先帝
山陵耳其立言命意全是不同培當讀為培塿之培
音薄口翻說文曰培塿小阜亦冢也孫晟言一培土
猶言一冢土耳唐陸龜蒙築城詞曰城上一培土手
中千萬杵則培土以益土為義一培猶言益一番土
也若據陸詩培音蒲枚翻亦通

通鑑二百九十四 凡二條


六年舳舻相連數十里

史炤釋文曰漢律名船方長為舳舻余按漢書武帝紀舳舻千里李斐注曰舳船後持柁處舻船前持櫂處言其船前後相銜千里不絕也小顏三劉無以異其說

翰林學士單父王著

史炤釋文曰單父縣名屬宋州余按唐書地理志單

父縣固屬宋州然唐末朱全忠置輝州於碭山分單
父屬焉尋徙輝州治單父後唐改輝州為單州此時
單父縣屬單州不屬宋州也



通鑑釋文辯誤卷十二